

**India: Import Minyak Sayuran Februari Susut 40 Peratus, Terendah Dalam 3 Tahun
Bernama
14 Mac, 2014
Oleh Saraswathi Muniappan**

NEW DELHI, 14 Mac (Bernama) -- India mengimport 578,975 tan metrik minyak sayuran makan dan bukan makan dalam bulan Februari 2014, susut sebanyak 40 peratus berbanding 969,175 tan metrik dalam bulan Februari 2013.

Keseluruhan import dalam bulan Februari 2014 terdiri daripada 569,544 tan metrik minyak makan dan 9,431 tan metrik minyak bukan makan, kata Persatuan Pengeluar Pelarut India (SEA) Jumaat.

Keseluruhan import minyak sayuran dalam tempoh November 2013 hingga Februari 2014 susut enam peratus kepada 3,496,807 tan metrik daripada 3,735,263 tan metrik, katanya.

Import minyak mentah dalam tempoh berkenaan berjumlah 2,715,257 tan metrik, susut sebanyak 14 peratus berbanding 3,163,239 tan metrik dalam tempoh yang sama tahun sebelumnya.

Bagaimanapun, dalam tempoh November 2013-Februari 2014, import minyak bertapis meningkat sebanyak 46 peratus kepada 705,475 tan metrik, berbanding 483,291 tan metrik dalam tempoh yang sama sebelumnya.

"Import dalam bulan Februari 2014 adalah yang terendah dalam tiga tahun kebelakangan ini, terutamanya disebabkan oleh perbezaan ketara import produk sawit, menyebabkan pengurangan drastik import minyak sawit mentah (MSM) kepada 269,000 tan metrik berbanding 670,000 tan metrik pada Februari 2013," kata SEA dalam satu kenyataan yang dikeluarkan di sini Jumaat.

Penurunan import MSM sebahagiannya ditampung oleh minyak ringan seperti minyak bunga matahari dan minyak kacang soya, katanya.

Sebelum duti eksport terbalik dikenakan oleh Indonesia pada Oktober 2011, olein sawit ditapis, diluntur dan dinyahbau (RBD) dijual pada harga sekurang-kurangnya US\$60/80 setan metrik lebih tinggi daripada MSM, tetapi sekarang ia US\$15/20 lebih murah berbanding MSM bahan mentah.

Dengan import olein sawit RBD yang lebih tinggi dalam dua tahun kebelakangan ini, penggunaan kapasiti kilang penapisan domestik susut kepada 30-35 peratus daripada 55-60 peratus sebelumnya, dan banyak unit telah ditutup atau diambang penutupan disebabkan oleh ketidaksamaan pemprosesan MSM.

Simpanan semasa minyak makan pada 1 Mac, 2014 di pelabuhan-pelabuhan dianggarkan berjumlah 475,000 tan metrik (MSM 240,000 tan metrik, olein sawit RBD 110,000 tan metrik, minyak kacang soya nyahgam 50,000 tan metrik, minyak bunga matahari mentah 65,000 tan metrik

dan minyak sesawi Canola 10,000 tan metrik) dan kira-kira 770,000 tan metrik sedang diproses.

Jumlah simpanan di pelabuhan dan yang sedang diproses, susut mendadak sebanyak 270,000 tan metrik kepada 1,245,000 tan metrik disebabkan oleh penurunan import dalam dua bulan kebelakangan ini.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1022001>